

四庫全書

經部

欽定四庫全書

經部

大易通解卷六

詳校官國子監司業<sub>臣</sub>納麟寶

通政使司副使<sub>臣</sub>莫瞻菴覆勘

總校官知縣<sub>臣</sub>楊懋珩

校對官學正<sub>臣</sub>蔡必昌


謄錄監生<sub>臣</sub>劉璫

欽定四庫全書

大易通解卷六

江常鎮道魏荔彤撰

震下



乾上

无妄无妄大畜二卦相綜而成俱四陽二陰之卦陽多陰少何根乎陰少用陰其體則陰也根於坤耳此二卦根於坤而繼乎需訟朱子獨有會於卦變則愚繼卦之說紫陽亦先啟之矣本義言卦變謂无妄自訟來

初陰上居於二二陽下居於初剛自外來而為主於  
內也二爻之陽在訟為主爻變无妄又以初六為主  
爻俱在內卦所以彖傳言剛自二外來居於初兩爻  
俱為主於內卦焉繼訟用陽爻以主卦甚明矣所以  
繼訟之義則訟之無情者不得盡其辭由於大畏民  
志而民志之大畏由於聽訟者之无妄也又非強其  
畏也天下雷行物與无妄民之志原自无妄知誘物  
化風移俗染失其无妄詐僞日生訟之原本也為上

者以无妄之體致无妄之用以一心之誠通天下之志訟之無也合上下彼此而反乎无妄之本然者也无妄元亨利貞其匪正有眚不利有攸往

卦辭元亨利貞同於乾以乾元為亨无妄則自利於貞少有妄則利在乎貞為占者明之使自審焉匪正則有眚矣何利往乎蓋无妄者天之命也人之性也率性之謂道而不可須臾離者也君子戒慎於所不睹恐懼於所不聞求全其无妄而已匪正有眚所往

皆不利所謂可離則非道矣○无妄立體元亨致用  
利貞又是由用以返於體匪正有眚不利攸往便是  
無體無用反復看倍明

彖曰无妄剛自外来而為主于內動而健剛中而應大  
亨以正天之命也其匪正有眚不利有攸往无妄之往  
何之矣天命不祐行矣哉

彖傳明卦名義曰无妄之剛自外来而為主于內主  
乎陽也訟之二爻在險中所以濟險使無訟也來主

於初為震之初陽即乾之元也又本卦之主爻也故  
首標出以示立卦命名之義其德則取乎動而健唯  
其剛主乎內斯動而無不健矣靜為動之本靜有常  
而動斯無所括也又有外卦之剛中為應所以大亨  
同於乾自以貞正為用也剛為主者體也動為健者  
用也大亨以正合體用而為一也乃本於天命之无  
妄也即乾之元所以統天資始人得之為性為仁而  
毫不涉後起之私者也言剛中而應亦同於訟訟以

九二主訟故以外卦之五言剛中謂五為能聽訟之  
大人而二以正應利見也此二卦相繼之定象也而  
義亦因之具矣匪正有眚不利攸往无妄為往固無  
所之而天命不祐豈可行矣乎哉天命即大亨以正  
本乎天命者也合之則祐悖之則不祐天無私命也  
裁者培之傾者覆之而已究之在人心分妄與无妄  
天祐不祐亦自主之耳詩云自求多福天命之祐所  
自来也此彖傳言天命以警人心也



按彖辭无妄之往與初爻辭有二義彖辭无妄之往乃失乎无妄之本體而往焉是離无妄而去之也初爻爻辭无妄往吉乃順乎无妄以往也何以不同在彖辭言本卦无妄之本體也故不可不守此而他往在初爻辭言无妄之用也可以推此无妄無所不往也

象曰天下雷行物與无妄先王以茂對時育萬物

象傳又就天之氣化以明天之命天命不可見可見

者氣化也猶之復之天心在陽生為復方得見耳雷在地中陽復矣盛而雷出地奮帝出乎震天下雷行矣於是天下之物無不得天之陽以為體所謂物與无妄也此物與无妄者合氣與理而言也氣以成形而理亦賦焉動乎天為繼之者善也畀於物為成之者性也人得其全物得其偏人得其同聖得其同中之異清濁厚薄各以為形各以為質各成其性此所謂兼理氣而言无妄之體也故有一物必有一太極

即一物一无妄也於此證會无妄本乾之元統天資  
始而主以震之長男仁濟萬物震動元陽廣大生意  
焉是震之陽即乾元也先王者率乎性之道修為教  
者也知天之命物各有无妄四時之行者此也百物  
之生者此也於是茂乎對時育乎萬物此聖人致中  
和之極成位育之能所以自全其无妄也所謂盡已  
之性以盡人物之性也本義釋對時育物置茂字於  
不言愚謂對時者四時也四時錯行中庸言之矣八

卦相錯易言之矣故知對即錯也四時錯行八卦相錯皆言對也對時正與萬物並言如論語所言四時百物也自當以茂配育對配萬時配物甚明也何以謂之茂乎茂即懋也書曰懋勤言勤也君子自強不息聖人至誠無息易言不息以合乎乾之天行健即詩言文王之德之純以合乎天之不已也聖人之勤合乎四時之運故曰茂對時也然時之行乃物之生之本也茂對時即育萬物之本也有萬物者以物遂

其生民復其性為育又以春為發生夏為長養秋為  
各正冬為保和之義為育乎是茂對時即育萬物也  
法天行健自強不已以合乎聖德之至誠不息則又  
茂對時育萬物之本也先王以一心之無妄上合乎  
天命之无妄下合乎物與之无妄期於合天地人物  
俱全一无妄共會一无妄也此象傳之言无妄取象  
於天下雷行氣之所行者皆理之所寓也

程傳釋茂謂如殷薦

盛行大舉永言之義然愚  
疑象傳六字作對句立解

或謂余曰无妄大象傳既有程朱之說而子乃有異解果然乎否乎余曰余遵經也大象傳凡四字六句八字無不以上半言上卦下半言下卦惟上下卦同者則渾言之或遞言之否則一句之中有兩意也无妄之大象傳乃以茂對時言天育萬物言雷也茂者厚也即中庸謂因材而篤篤字之義篤厚乎四時使之流行順序者天之氣也先王以德合天且能使天之氣流行順序乎四時者至篤厚而至茂盛則四時

之成功固天主之其實聖人主之矣不曰茂四時而  
曰茂對時春與秋對夏與冬對時有流行有對待天  
地之氣化自然有此二者不可執一以流行者言四  
時而謂不可以對待者言四時也不曰厚而曰茂者  
又以發生之氣為四時之元氣茂盛者可見于春者  
也篤厚者不可見于四時者也先王以仁心合乎天  
地發生肇端以仁長五德猶之天以東方震動之陽  
氣長終歲之氣也一言茂而篤厚自在其中矣先儒

自有見不及者何不遵經而遵註也若以對時育物為說則於經文先從後儒所見為損益矣余不敢悖經徇註也

或問余以對時為四時有本乎余曰有蓋本於本經說卦傳云八卦相錯也錯之義對也又本於中庸云辟如四時之錯行註云錯猶迭也八卦相對而曰錯者相對而交錯亦以對待為流行也然則對即錯也錯即對也四時言流行對時言對待皆言時而已矣



不言四而言對者就天象言也就天象與雷聲分言也雷動於下言育萬物已言流行矣則天象之動又為主宰此雷動者主宰者氣體也故天動而亦可謂之靜對雷動言則靜者為體也既于雷之象育萬物者言流行之用不又于天之象茂對時者復言流主矣必言對待所以不言四時而言對時一體一用昭然分言之矣疑乎且余更有本于聖人之言曰四時行百物生乃以四婉萬以時婉物則非無本也明矣

況對也四也可言則俱可言古人文字多一義數名  
漢人以後則拘泥矣先去宋儒所言必不可易之私  
見方可與言易通不然此書俱可廢也寧止此一字  
之異同乎

初九无妄往吉象曰无妄之往得志也

初九變否之初六在否初變陰為陽為无妄有拔茅  
彙征之吉否而變陽成无妄故可以合三陰而彙征  
得吉同於泰初也

在本爻以陽變陰為否乃无妄之主爻根柢乎无妄者也故以卦辭无妄繫之往而吉即匪正有眚不利攸往之反照也象傳言得志志在心无妄之命於天率乎性者也志在於是體立用行以此為往吉不須言矣

初爻无妄之往吉上九何以无妄又不可行乎上九无妄之極則至誠之无妄變為因任私意而行有所恃而妄行矣故中庸云君子而時中小人則無忌憚

亦此象也

六二不耕穫不菑畲則利有攸往象曰不耕穫未富也  
六二變履之九二在履二以陰變陽為无妄繫以履  
道坦坦幽人貞吉以无妄為履坦坦可知幽人所守  
者以无妄為正道何弗吉乎

在本文以陰變陽為履繫以不耕穫不菑畲先難後  
獲之義也如此則利有攸往亦兼履之貞吉為无妄  
之往也有正誼明道之心無計功謀利之見則无妄

以為往何弗可往乎象傳言未富也富者陰也變陽則志不在富而以立德為急所謂以義為利不以利為利也

六三无妄之災或繫之牛行人之得邑人之災象曰行人得牛邑人災也

六三變同人之九三在同人之三以陽變陰為无妄因錯師而言伏戎然升于高陵因變離而避難也三歲不興无妄則明而不疑故不妄動也

在本爻以陰變陽反有无妄之災何也震體變離明過則誠意不足於已矣故不見信於人有或繫之牛行人得而邑人災之象不誠則亦不明矣兼同人以言行人邑人合人已為无妄方為本忠行恕也象傳言行人得而邑人災則明亦不足以辨矣不誠之明非明也必无妄而明則誠而明也此爻貞悔對看同人之三亦有所疑故伏戎然三歲不興因變无妄而察實釋疑也占者得此以誠為明乃能合人已以成

无妄耳

以上内卦三爻震動之體德初為内卦之主爻且主  
乎一卦乃无妄之本體也无妄则无往不吉矣二亦  
云利有攸往隨初陽而往震陰本隨陽也三變離而  
明反生疑故有此得彼災之外然果无妄誠至而疑  
釋乃大明耳内卦主初爻二三爻有隨陽不隨陽之  
別故信疑亦不同終歸之隨陽則誠立而无妄矣  
九四可貞无咎象曰可貞无咎固有之也

九四變益之六四在益四以陰變陽為无妄繫以中行告公從者无妄而人已皆孚也利用為依遷國乾變巽而進奉乎陽五五為君而利於依乎有益之臣也

在本文變陽為陰為益變陰則宜於貞而方无咎可貞者非以貞為利自然當正也四為初陽正應變陰有得應之義故必戒其貞以為應也象傳曰无妄可貞固有之也无妄非自外鑠我者我固有之也孟子



言性或得於易乎即言貞亦不自外求固有此无妄即固有此貞可貞者取懷而自足矣四乾體本无妄也變巽而得貞則仍乾體之无妄而已

九五无妄之疾勿藥有喜象曰无妄之藥不可試也

九五變噬嗑之六五在噬嗑之五以陰變陽為无妄繫以噬乾肉得黃金噬嗑用明以為斷也變无妄更以誠得明所以能噬得黃金變乾為金也猶必利艱貞者五陰爻必无妄乃其所以為艱貞也

在本文以陽變陰為噎嗝无妄陽變陰无妄有疾矣  
勿事於藥以治之也惟復乎无妄而疾自愈有喜矣  
兼噎嗝義五之疾飲食致病也節飲食足以致喜不  
必用藥可知矣象傳以為藥不可試為醫言慎重也  
然能无妄則亦無疾矣何須試藥乎今之以藥為試  
而致疾者觀於此爻能无妄其妄疾之瘳也大半矣  
蓋疾亦未有不自妄而得者知其妄在何事在何念  
以无妄治之焉藥不必試富哉言矣

上九无妄行有眚无攸利象曰无妄之行窮之災也

上九變為隨之上六在隨以陰變陽為无妄繫以拘  
係之近五之陽也然有正應使之維於初以成隨如  
亨西山然立誠主敬也蓋隨初綜之即蠱上爻山之  
象也無非以交為隨以隨泰交耳隨初爻之陽得无  
妄之本矣

在本文以陽變陰為隨乾體變兌悅涉於私將失其  
无妄矣故以卦辭之匪正有眚不利有攸往於此戒

之戒於終也必終於无妄方為无妄之全體也言其  
行有青眚由於行行匪正可知又何往乎象傳言窮  
之災无妄何有窮乎窮於妄耳若无妄則終之始之  
愈久愈通天地之所以為天地至誠之所以為至誠  
皆以此為恒久而不已也然則无妄之窮而災非妄  
而何甚矣人於无妄全而生之全而歸之終食之間  
無可違造次顛沛必於是為仁之難而至誠無息之  
不易得也

以上外卦三爻乾健之體德四言可貞正與初應以  
无妄相交應也五主外卦變陰有疾然无妄之疾不  
必藥全其无妄而疾愈矣上變兌是无妄而因行得  
妄也故為窮則變變則災所以勵无妄於終也外卦  
乾體何以五上皆無吉辭四變巽无妄之進也可貞  
仍无妄无妄可以攸往變巽何咎變離則明或傷誠  
變兌更有私悅故一一示戒焉然乾體之卦必以五  
在中者主外卦附於初陽初陽動而天下皆應也○

无妄之内卦以震初為主无妄之本也二必示以後  
所獲三必示以去所疑皆以成无妄之行也且以考  
无妄之心也外卦三爻乾體本无妄而變則妄矣故  
四云可貞五云勿藥上則嚴戒其窮災也盖无妄雖  
存於一心而天下事物之衆吾生歲月之長事物相  
擾堅久最難誰能於身心之際人已之交確守此无  
妄而無毫髮變渝者乎唯大人乃能不失其赤子之  
心也唯聖人乃能踐形盡性也此物與无妄克終始

者之鮮也

卦既以天雷成卦而謂之根坤者所象者天命人性在天雷之象義則繼善之陽在人性之象義則人性之陰也故二卦陽為體命也陰為用性也及以无妄象雷動於天則又以性為體矣卦言无妄之本體也故主陰而根於坤焉

乾下  
艮上



大畜大畜與无妄相綜之卦也二卦俱根於坤用陰貴陰

至无妄繼乎訟大畜繼乎需本於卦變朱子已言之  
矣愚又申明无妄繼訟者欲以无妄無訟也大畜繼  
需者需之懿文德即大畜之多識前言往行以畜其  
德也俱從朱子之說推原其義也

大畜繼需朱子謂卦變大畜自需來陽自五爻上居  
上陰自上爻下居五爻傳謂剛上而尚賢也

蓋需者需於久也飲食宴樂以為需而剛健篤實之  
德日積矣德之畜也然畜德非學古證今無以得大



多識前言往行者畜學所以畜德也需之愈久畜學益多畜德愈大矣此大畜繼需也根坤者凡言畜皆為陰也綜乎无妄者无妄後受之大畜无妄為畜大之根基本源而非口耳記誦之末也

大畜利貞不家食吉利涉大川

象辭無元亨但繫以利貞大畜之元亨在後利貞所以為大畜大畜之久方有元亨故不繫於大畜之始也不家食者亦從需之飲食宴樂來不食於家非教

人干祿也不食乎私乃所謂不家食也飲食人之大欲稍涉於私非大畜用陽為德之義矣所以需言飲食而大畜言不家食大人食其德小人食其力方謂之不私食而吉也迨畜之既大而久則利涉大川無往不利此即元亨也故愚謂大畜之元亨在後也聖人繫辭如此亦先其難而後其獲耳

象曰大畜剛健篤實輝光日新其德剛上而尚賢能止健大正也不家食吉養賢也利涉大川應乎天也

彖傳明卦之名義而歸重於德大畜以山天合成其卦乾陽自是天人為德之本然言大畜則必用陰而後畜之大必如艮之止於至善而不遷又如山之積卑以為高而後可謂之大畜其德也以德本於乾之剛健為主而又加篤實焉即以乾天之剛健加以艮山之篤實也艮上一陽山所以成山篤實之所以為篤實也然即乾之元寄艮上爻為在艮成艮者也輝光亦艮象所謂其道光明也以乾之剛健主乎中以

艮之篤實安所止則內誠而明著於外矣所以象艮之輝光即乾之所謂精也由純粹而精精則必有光凡成形之物皆然德雖虛而無形闇然日章其光亦有不可掩者此大畜之所以畜其德也然有乾之剛健為主則艮之止者非止也崇累以漸高明光大以無止為止也所以畜之愈久愈大而德與日俱新日最有恒者也日新而不已也以之象大畜之德非文王之緝熙敬止湯之聖敬日躋不足以當之此大畜

畜德所取之象義也其卦變自需來需外卦坎中之陽剛上居於上爻所謂剛上也上乎上又不言上上但言上者如賁之分剛上而文柔也如噬嗑之柔得中而上行俱以一上字該之從省文也且又取象乎上賢上尚也尚乎賢人使之居於五君位之上以止其健乃大正之道故彖辭繫以利貞也剛健者君之美德又何尚賢用止健乎易之取義無方無體若武人為於大君則健又為陽之惡德矣德之為義有美

德亦有惡德所以言能止健尚賢以止過剛之健也  
非止中正之剛健也方可謂之大正蓋過健亦非正  
也豈獨陰柔之過方為不正乎不家食者以需之飲  
食宴樂用以養賢而不令其家食則為上者之吉也  
非賢之自謂吉也宴樂嘉賓者厚則玉食自奉者薄  
君不私其食亦為不家食豈必野不留良俊傑在位  
而後謂之不家食乎自需而來為大畜凡飲食宴樂  
之日皆日新其德之時也在需已言非耽佚樂貪口

腹矣所以不家食不啗以賢人言必重乎賢君為尚  
賢之本以立言取義也利涉大川傳謂應乎天也以  
乾之剛健為體而以止於至善制用俱主陽用陰此  
地道也即天道也所以謂之應乎天也彖辭言利貞  
不言元亨乃以利涉大川繫之則以大正之道為涉  
川之行元亨不待言於利貞已明之矣是大畜之由  
利貞而利涉大川正為得乾剛健之元更以止為節  
制致乎涉川之亨也

象曰天在山中大畜君子以多識前言往行以畜其德  
象傳明大畜之象曰天在山中天何以在山中天之  
氣在山中耳論地氣之陰陽以高出者為陰以窪下  
者為陽也山高出於地乃地之陰何以又為天之陽  
乎乃天之陽氣貫於地中即貫於山中也所以艮之  
下二爻為陰地氣也上一爻為陽天氣也況地氣即  
天氣地本以天之氣為氣萬物之氣有陽有陰皆以  
天氣為氣凡氣皆天也氣即天也天與氣非二物也



知此方明天在山中非無此理氣而卦爻能虛言其象焉君子體此多識前言往行以畜其德多識前言往行多見而識之乎亦微不同多見而識之就現在見於當世者也多識前言往行又必與古為徒稽討考辨之事也前言往行雖亦兼善惡言然善惡必已彰明矣不同多見而識之自我方別辨以為從違也亦必兼多見而識之以為多識大畜之義也古今言行皆畜德之資也既已多識自專取嘉言善行為法

矣古今人以心德著為嘉言善行即取為畜德之助  
此大畜乃德之藉於外以修其內者也蓋畜德必兼  
畜學明理而後能成德雖生知安行之聖亦未有舍  
學而言畜德者特不為玩物喪志之事而已畜學畜  
德聖人自道以勉人藉易象以實著其義又非寓言  
於虛象明矣然何以取象于天在山中乎山者物也  
天者德也山之為物草木生禽獸居寶藏興為物多  
矣多識前言往行象乎山也而天氣行乎其中寄於

山而實不滯於山且以主乎山也此所以德為物宰  
藉物以明理明理以畜德而德自成於一心矣不貴  
於耳目聞見之迹徒為淹雅博洽之士也此畜德所  
以取象乎

初九有厲利已象曰有厲利已不犯災也

初九變為姤之初六在姤初以陰變陽為大畜其辭  
云繫於金柅貞吉有攸往變乾故曰金柅貞吉則有  
攸往者本巽以為進也然為陰之始進將見凶如豕

之蹢躅也乎者初陰未能蹢躅妄動之念起則類於壯承蹢躅耳

在本爻則以陽變陰為姤繫以有厲利已者止而不進則似乾變巽進而可以大畜矣但大畜之初未能大有所畜輕變妄進故利於已也象傳所以言其已不犯災不許其輕變而進當以剛健為本畜之久而自大也

九二輿說輶象曰輿說輶中无尤也

九二變為賁之六二在賁二以陰變陽為大畜有賁其須之辭以大畜為賁飾乎德而容貌應之矣

在本爻陽變為陰為賁畜不宜變變則以乾為離中實變虛與而說輟矣不言凶咎與說輟既不能行則不能畜也象傳曰中无尤也尤者尤人也變而不畜則不能有涉川之利不得元亨矣自己為之何有尤人之心存於中乎

或曰中无尤也能以剛健中正為畜則虛說者必實故可以无尤矣

通亦

九三良馬逐利艱貞曰閑輿衛利有攸往象曰利有攸  
往上合志也

九三變為節之六三在節三以陰變陽為大畜兼大  
畜義繫以不節則不畜可知必嗟若矣又云无咎者  
無所怨咎於人也

在本爻以陽變陽為節兼節義繫以良馬之逐利於  
艱貞不利於速而輕用以致敗也故必曰閑輿衛則  
利有攸往善乎御馬者不盡馬力也不盡則畜大矣

象曰上合志也以乾之健良馬也利艱貞而必曰閑  
與衛則合乎上卦艮止之義矣以止為健大畜之義  
所尚也是又貞悔相應甚切

以上內卦三爻乾體初在大畜之初變巽進則不能  
畜故利於已二變離居中主卦離虛則不能畜矣故  
如興而說輟三變兌必利艱貞方利攸往貞即乾健  
所以主持兌悅而不致苟悅者此內三爻俱以陽而  
用陰乃大畜之義象也以二爻之中主內卦本健陽

也而附乎止方為大畜則陰用矣初三兩爻附二爻  
初九利已三之艱貞皆用陰之義象也

六四童牛之牯元吉象曰六四元吉有喜也

六四變為大有之九四在大有之四以陰變陽為大  
畜兼畜為有曰匪其彭不敢侈其有也正為畜之大  
也故无咎

在本爻以陰變陽為大有象以童牛用牯大畜外卦  
止體變離不能止取義於童牛而牯之不令輕動也



大畜亦非止而不動然畜之欲大故牯牯必曰牛牛而童已牯之性不能變必馴順其行所以元吉也象傳言有喜即元吉耳

六五積豕之牙吉象曰六五之吉有慶也

六五變為小畜之九五在小畜之五以陽變陰為大畜繫以有孚學如明五陽皆畜於四四為主爻也由於其誠足以畜之耳不自富而以隣小畜為大畜矣在本爻以陰變陽為小畜象以積豕之牙豕陰而牙

之用陽止為陰變異進則陽也大畜非止而不進也  
乃進而求所未知未能以日新其德也故豕遲鈍如  
止象而牙則銳利如異象也體止用進所以為吉象  
曰有慶亦言吉耳四五兩陰爻在艮卦為止體變離  
則牯之以定其心性變異則用牙以勉其功力皆為  
畜德畜學者言也豕陰也然牡豕陽也牡豕去其勢  
為續豕變陰然用牙則豕陰體而用則陽矣大畜根  
陰愚釋續豕之牙取艮變異之義象有所本也

上九何天之衢亨象曰何天之衢道大行也

上九變為泰之上六在泰之上爻以陰變陽為大畜  
繫以城復于隍泰之終將為否貴於止以保泰兼畜  
則亦以止為保耳

在本爻變陽為陰為泰大畜而能泰雖山之高極猶  
如地之卑不自知其畜之大是大畜以無終為之終  
也地道也即天道也蓋地之卑也本為天之下濟所  
成也所以繫何天之衢卦辭言涉大川不足以盡之

即上行於天衢亦無不利而吉也象曰道大行也大畜之利貞於終所以為元亨之大行亦猶之卦辭所言也山天大畜變泰山高變為平地乃言天衢天衢即天道天道即天氣也寧止天之氣貫乎地中乎天之氣散在萬物其理亦即寓於是所以於大畜之終既言天衢又言道行見畜學之久其畜德同乎天之大由聖人畜學畜德遂能體道也聖人之道且合天地萬物以為畜矣故行於天衢無不亨也可知聖人

體道在立德立德在好學好學則天地萬物之理明而一心之理備矣是聖人以一心備天地萬物於其中為畜也畜又奚有大於是者乎

以上外卦三爻艮體以止為畜畜所以為大也六四變離童牛而牯之畜陰以為用也六五積豕而用其牙亦畜陰所以養陽也二陰爻言畜從上爻之陽以止為畜之大也畜大之極至上而如天衢之無不通矣此大畜以上爻主乎全卦之義象也本卦山天皆

陽卦而根坤者大者陽而畜之歸陽於陰陽乃愈畜而愈大耳所以大畜畜德畜學皆於一心之陰而所成者為功為業至大顯諸仁藏諸用陰陽互為體用固矣而言畜則陰用根坤無疑焉

震下  
艮上



頤頤與大過相錯頤四陰二陽根於乾繼乎屯蒙臨觀由之而歸坎以終上經蓋頤陰多陽貴故主陽以下震初爻之動合上艮上爻之止以為頤也繼乎臨觀

者治民之義首重於養養民則民亦養之即公卿大夫賢人君子勞心治人亦頒祿於君取賦於民以為養耳然民之自食其力究為待養於上此所以繼臨觀之卦也然則震下之一陽即臨艮上之一陽即觀也所以謂之根於乾而貴陽用陽焉臨觀又繼乎屯蒙無言教養先養後教於臨觀已明其義矣然頤養也言養賢非教乎養與教原不可離之道也

頤貞吉觀頤自求口實

彖辭首繫以貞吉頤之為義養也養非正何吉乎屯  
之不寧求養之始也遂生也蒙之養正善養之終也  
復性也頤之貞吉參二卦之教養必正而後吉也即  
臨觀之臨民觀民亦不過遂生復性而已然本卦以  
頤養為主見得養後必善其養之義故必觀頤之所  
以為頤自求可以實乎口者出於應得之正否養者  
利也所以得養者義也見得則思義以義準乎利斯  
實其口而無愧耳小民則戒游食矣君子則恥素餐



矣王公之貴則菲飲食是尚矣恣口腹是警矣皆觀  
頤必貞吉以求口實之說也卦上下二陽中四陰取  
象於口虛其中體也而實其用實陽也當義合道之  
食所謂實也故動而求頤必止而觀頤以初上二陽  
主乎四陰象在而義起焉

彖曰頤貞吉養正則吉也觀頤觀其所養也自求口實  
觀其自養也天地養萬物聖人養賢以及萬民頤之時  
大矣哉

彖傳釋卦名義曰頤之貞吉惟養正則吉即蒙之養正也蒙之養正在心德不止口實而口實亦關乎心德未有養口腹失其宜而能養心德也人能無以口腹之害為心害不及人無憂矣孟子之說也蓋飲食男女大欲存焉於此得正正之始也至於觀頤象又推廣言之觀其求口食則非一身之口實而凡待養於我者皆必養之得正矣如以厚祿給佞倖以有用耗冗食且廐有肥馬野有餓殍豈正乎兼觀於此致

養之正否而其自求口實之道亦得矣故必合觀其  
養人養已則其所以自求口實者俱在觀頤之中矣  
○分觀頤之所養而以自求口實觀其所自養蓋觀  
頤就人以觀乎主頤者言也自求口實則端為自觀  
其頤言也卦辭意重在自觀故但有觀頤自求口實  
之辭彖傳補觀其所養一義則並其所養亦當重也  
不可謂孔聖之說即文王之說如此類甚多學者詳  
之

孔聖又推頤之本源自天地養萬物為始萬物之在  
天地自養耳而無一物不取養於天地也天地必作  
之君以養萬民是君為養物之主命於天者也天地  
養萬物作之君君不能以一手足之烈養萬民也又  
寄之於賢於是有德有位之聖人必養賢以佐理然  
後明良合志家給人足萬民無不得其養焉是頤之  
道本乎天主於君而任之賢也頤之為時豈不大哉  
言時者養民之道重在不違民時民時即天時也王

者治歷明時原利民用以裕民養也是本乎天地養萬物之心為心故以天地之時用於民為養也不敬乎天時不重乎民食豈奉天愛民之王政乎孟子論王政首言不違農時又民事不可緩也皆本於易也象曰山下有雷頤君子以慎言語節飲食

象傳曰山下有雷就二象另申一義與卦辭亦大不相同山止而雷動動者象言語之出止者象飲食之入也諺曰病從口入禍從口出此聖人以慎言語節

飲食象頤亦内外交修之道也言語者志之事也飲食者氣之屬也君子體乎震之動而為言必用艮之止德以慎之君子欲訥於言也君子體震之動而為飲食必用艮之止象以節之君子食無求飽也所以成德檢身守口寡慾之道俱在是矣所謂養得其正無身心以為養内外以為修方為得正也

初九舍爾靈龜觀我朵頤凶象曰觀我朵頤亦不足貴也初九變為山地剝在剝初以陰變陽為頤有剝床以

足之辭就剝卦言初之位也

在本文以陽變陰為剝就本卦言陽變為陰失乎震動之體而失乎主頤之義象矣故為舍爾靈龜觀我朵頤也靈龜者不食之物朵頤者欲食之貌本義言之矣頤求口實何取於不食蓋靈龜食氣未嘗不食何必口中有實物而後為口實實之以氣陽之本物也靈龜之食氣而得長年勝於食物者多矣舍延年之服氣而觀肉食以垂涎凶之道也氣陽也舍者因

變陰為剝也龜陰物也物之成形者也取象義亦甚確象傳以為不足貴謂含貴而取賤也

六二顛頤拂經于丘頤征凶象曰六二征凶行失類也六二變為損之九二在損以陽變陰為頤繫以利貞征凶弗損益之二在初上初已損而不宜再損故惟宜利貞征則凶矣弗損益之仍為利貞而吉也損初上兩爻乃主乎損益二卦者故二爻附初為義象也在本爻以陰變陽為損兼損義而繫以顛頤拂經止



而動為頤止而悅則非頤矣人無不食之頤此顛乎  
頤而拂乎經者也丘者先代之丘墟也漢息夫躬傳  
云止於丘亭謂空亭也止而不動悅而怠於動欲於  
空中求養此所謂征凶也象曰六二征凶行失類也  
失類者君子居人類飲食之中不容去而之於無人  
之地故凶也

六三拂頤貞凶十年勿用无攸利象曰十年勿用道大  
悖也

六三變賁之九三在賁三以陽變陰為頤止變離象以賁如濡如飾宜乾潔而不宜濡濕也故永貞則吉在本爻以陰變陽為賁取象於陽為拂頤頤中之陰變陽則拂乎頤之道矣口中之實宜遇陰柔不宜遇陽剛也故愈貞愈凶十年勿用无攸利口實之致養本陰之為氣為物也而用乎陽十年之久亦無所用何往而利乎好服金石丹藥者宜有鑒於此即大熱有毒壯陽益火之劑亦當審慎其人而為用矣象傳

言其道大悖養以陰而變於陽於養之道洵大悖乎  
以上內卦三爻震體初為震之主爻然變坤則失震  
動之德故舍龜而求朶頤有凶也二三兩爻皆隨乎  
初陽為動二變兌則不食如言辟穀延年之術者是  
也三變離則食陽如言服金丹大藥之說也二者皆  
非致養之正故俱有顛頤之凶也兌為口故於丘頤  
離為明過於求養而反拂頤三爻皆失乎下動上止  
之義象故無吉占也然初主內卦二三爻附之合上

成頤其卦體象不因變象言凶而易之

六四顛頤吉虎視眈眈其欲逐逐无咎象曰顛頤之吉上施光也

六四變為噬嗑之九四在噬嗑之四爻以陽變陰為頤噬嗑之四爻為陽剛之物也必噬而嗑之決斷此物方合卦名義變陰似得遂其噬嗑所以云得乾肺又以五變乾得黃金而四附五得金矢然必艱貞為利而後能噬而嗑之也

在本爻以陰變陽為噬嗑不取陽物不可為養而取  
乎求養不尚乎獨養也亦繫以顛頤者因四爻在上  
止體以止應動而求養賢似乎顛倒也然在內卦主  
震變則失震動之體故凶在外卦主艮變止為離是  
明於求賢以為養也故吉特患變剛近明察耳故象  
以虎視眈眈而其欲逐逐求賢之念太急又恐失乎  
為頤者也无咎者頤重養賢雖太急未得當於頤而  
亦可無咎也象傳云顛頤之吉上施光也上爻艮止

之陽施乎光者也。艮有其道，光明之義，四隨上止以爲止，乃合乎頤。所以爲上施光也。蓋外卦主艮，四爻五爻皆從乎上爻，所以象傳言上施光也。何以切頤頤之吉乎？以四之光施於初而爲明，仍是以止爲頤。雖顛乎頤而合乎動，可以成頤，不失乎艮之道，斯吉也。○虎視眈眈，其欲逐逐，似不能以止體自安矣。何吉乎？然既隨上以爲止，自亦不致於明動亂靜也。此无咎之義象也。

六五拂經居貞吉不可涉大川象曰居貞之吉順以從上也

六五變益之九五在益五以陽變陰為頤巽進以為益能變止而有常益焉所以繫之以有孚於施惠之心也勿問而知元吉且受益者亦將孚乎施惠者之心而以德轉惠之矣

在本爻以陰變陽為益繫以拂經者求頤不可有變巽求益之心也止而變巽拂乎養正之經矣居貞者

知所止也不可涉大川益五有涉大川之利頤五不  
可以涉大川上益乎下則可涉川求頤於人不可冒  
險也象曰居貞之吉順以從上也居貞正所以從上  
一陽為安止而得吉之義象也四五兩爻變則不安  
於止或剛暴無厭或饕餮不足故一曰顛頤一曰拂  
經皆不能順以從上也二三兩爻從初成震必順乎  
初四五兩爻從上成艮必順乎上此頤之正也悖此  
則失養正之道故同為顛頤拂經而各有失之義也



○四爻上施光由順以從上為解而得之亦以傳釋經不敢自立說也艮每言光在大畜言輝光在謙言光明皆本於艮之彖辭云其道光明也四變離而云上施光言不貴四之明而貴從上爻艮之光也非以艮之光助離之明乃以艮止中之光為離明之尚綱也

上九由頤厲吉利涉大川象曰由頤厲吉大有慶也

上九變為復之上六在復之上六以陰變陽為頤順

乎動為復變止則非順乎動矣故為迷復至於用師  
喪敗十年乃復復不可迷迷則陰盛而剥浸至矣又  
必十年之久而可復也

本文以陽變陰為復何為由頤蓋頤以上止下動為  
頤上艮之主爻故謂之由頤今變止為順能順乎初  
陽之動而為頤故仍可言由頤雖厲而仍吉也厲者  
變坤隨震動則危而其象義則吉者因止之為義非  
止而不動貴止動得正耳今順乎動似危而得正則

吉也頤之終而以順致之則養賢養民皆順乎動而得正也又繫之以利涉大川者正謂不揣自養以為頤而必養賢以養萬民有合乎天地萬物之心大得乎頤養之正道是為頤義象之大者非涉川不足以言之也不然何以象傳於厲吉之爻言大有慶乎玩易不能通貫則固矣本義謂上爻剛上而尚賢卦變之所以成頤故謂之由頤蓋以上為賢由之以養萬民也亦切但本卦原以上合初成頤惟其變坤故云

有屬不詳釋之則屬之一辭無着矣本義言卦之本象愚說言卦之變象也

以上外卦三爻艮之止體以艮止止震動所以成頤也四之顛頤吉者變明以求養能隨上止動也五之拂經不言吉凶者以變巽故戒以居貞隨上也上九一爻主乎外卦合初成頤故為由頤屬者變止為順則屬順而止動得正乃吉也故合乎初以成頤而與初上下合主本卦焉

巽下  
兌上



蓋大過與頤相錯大過四陽二陰根於坤繼需訟无妄  
大畜而得大過以歸離乃終上經焉大過所以繼无  
妄大畜者大畜无妄皆過乎陽過於陽則為大過大  
者陽也陽過則以陰為用為貴故謂之根於坤由需  
訟而繼以无妄大畜則已於无妄大畜明其義矣○  
其卦上兌下巽中四陽而陰居初上二爻實為陰弱  
而不能包涵乎陽故陽太過必貴調劑以陰焉象見

而義在是

大過棟橈利有攸往亨

彖辭棟橈棟者梁上短柱就陰之小弱取象棟橈則梁柱皆不得用大過則小者不及大者亦無足任矣所以陰陽貴中而不貴過好為扶抑之說者於此當致思焉何以利攸往乎非謂陽盛可任往也其卦德兌說於上而巽進於下有攸往之利也然則其象雖陽過而其德則兌說巽進皆陰也外陽為用似過而

內陰德足以濟之過而不過所以利往如是而乃得亨也不然方言棟橈又言利往而亨聖人無此牽混之辭是棟橈者其象陽用也利有攸往本於巽說乃亨者其德陰體也所以謂之根於坤也俱以陰濟陽為貴則本卦貴陰明矣蓋大者過小者不及故本末弱也若大不過小者亦無不及本末亦不弱矣

彖曰大過大者過也棟橈本末弱也剛過而中巽而說行利有攸往乃亨大過之時大矣哉

象傳釋卦名義曰大者過也名卦體象也棟橈本末  
弱者謂二陰在初上而四陽在中也陰陽以交際為  
中和陰在本末而陽俱居中中雖盛而本末弱中之  
盛者亦同歸於不得用而已故取象於棟橈小材橈  
矣大材豈能獨任一室之重乎何以又言利有攸往  
陽剛雖過盛於中中不獨謂二五得中謂四陽在內  
即對二陰之本末言也又言卦德則巽而說以為行  
故利有攸往而亨也傳之釋卦辭利往而亨亦主卦



德耳剛過而中一語多以為二五得中者抑知大過無二五為中之義乎既四陽居中為大過則所謂剛過而中者聖意曰陽剛過而又在卦中見大過為陽剛過盛盛陽在中則本末之弱可知矣如此可以為行乎又轉一語曰巽而說乃所以為亨也其德則陰以主之為巽為說所以為行所以為利往而亨也復就大過之時以明其大者大過之時以陰德濟大過之時事悅必志洽心孚巽必謹言慎行非有大過人

之心思智力不足以有用也所謂其知可及也其愚不可及也若不善會本義之意謂大有為之材乃用壯而往也左矣

象曰澤滅木大過君子以獨立不懼遯世无悶

象傳曰澤滅木大過澤陰物也木陽物也澤滅木何以謂之大者過乎謂澤在上卦木在下卦固然而另有義所謂滅者正如水之滅火也象以澤之柔而監制乎木之剛歸於中和也且兌金也以兌制巽巽進

和說得剛柔之宜則大者不過矣象以東南六陽之位豈不大過至於兌而四陰正長澤不惟革火且滅木大者何過此大過始用陰以悅為巽行利往而得吉及至陰盛用事又不可輕為往矣君子體之獨立不懼遯世无悶更取義雖當用柔濟剛而非無剛也當此兌澤革火滅木之時非君子得時行道之日也向所謂兌悅者非苟悅以取媚也所謂巽行者非枉節以求合也故雖獨立亦不懼雖遯世亦无悶君子

之悅即不合而有不懼之勇君子之行即見阻而有  
無悶之仁是兑巽之為德雖陰用而所以濟之者兑  
下二陽巽上二陽也卦雖陽多陰少貴陰用陰然濟  
之者仍陽則調劑陰陽歸於均平又何非乾元以統  
天者統坤乎此象傳又為兑巽二卦明其用於陽過  
之時而以君子為歸焉

初六藉用白茅无咎象曰藉用白茅柔在下也

初六變為夬之初九在夬初以陽變陰為大過繫以

壯於前趾往不勝為咎者夫在初即用壯所以為咎也兼本末弱之義也

本文變陰為陽為夫兼柔乘剛之義繫以藉用白茅无咎陰弱以有所憑藉而得安矣象曰柔在下也又以白茅為柔物而可任重於陰柔弱而可任重中又生一義爻辭謂下弱而藉茅可安象傳又謂柔雖弱而重任且藉之以安也總是重陰於大過之時也

九二枯楊生稊老夫得其女妻无不利象曰老夫女妻

過以相與也

九二變為咸之六二在咸二以陰變陽為大過繫以咸其腓凶居吉蓋山止而外兌來感通風散而外兌不能感通矣腓不動物隨股而動艮二爻象之矣今變悅為動妄動不能感物凶可知也居而不動則吉也

本爻變陽為陰為咸繫以枯楊生稊老夫得其女妻无不利者兼咸感之義象婚媾之道也女妻指初陰

也卦之本弱得二陽為夫而可以行其巽進之志也  
故无不利象曰老夫女妻過以相與也正謂初二兩  
爻相與則陰弱得強也大過本言當益陰九二陽爻  
過也而以濟初陰斯過不為過而能相與方合乎卦  
義故无不利之辭同於卦辭之利有攸往矣

九三棟桡凶象曰棟桡之凶不可以有輔也

九三變為困之六三在困三以陰變陽為大過有困  
于石據于蒺藜入于其宮不見其妻之象坎險變為

巽進不能附於二之中陽困於險以求進又以陰柔不能進所以有石及蒺藜之阻也固兼大過而有入宮無妻之辭然困之六三在困卦亦夫妻也正反乎大過二爻之以陽附陰得其女妻之義也

在本文以陽變陰為困兼困象義而有棟橈之凶棟橈原謂初上而於三何取象乎不知三爻乃巽之上爻正積累於初爻本弱之上者也三居二上二居初上初之本弱因累重而棟橈於三居上言之正見大



者過也涉大不過重則本亦不顯弱矣初棟也三是  
橈之由也象傳謂不可有輔也輔者以陽輔陽也二  
以濟初為吉陽濟陰也三以輔二為凶陽助陽也大  
過之時祇以濟陰不宜助陽若輔陽則大愈過而重  
本愈不及而橈且折矣象傳之言足破羣疑而知愚  
說有所據矣

以上內卦三爻巽進之體德然本弱何以為進故初  
示以用白茅藉柔為剛用柔本剛則本不弱可以進

矣二以輔初陰得女妻无不利三以輔二積陽實之  
重以致本弱之凶一從一違於是大過用陰之道吉  
凶判然矣蓋初乃巽內卦之主爻且本弱藉茅可為  
通卦之主爻矣

九四棟隆吉有它吝象曰棟隆之吉不桡乎下也

九四變為井之六四在井四以陰變陽為大過兼大  
過而為井甃无咎亦有濟陰之義

在本爻以陽變陰為井澤之在上者變為水而在井

陰之多濟也可知矣棟之弱者可隆矣然四與初為  
正應濟陰必應揣心濟初有它念則吝道也陰陽之  
道如夫妻然婦以從一而終為節夫而有它亦非義  
之正也三四俱在中正所謂大者過也正所謂剛過  
而中也三以輔陽而棟橈凶四以濟陰而棟隆吉可  
見彖傳言在中之象義矣象曰不橈乎下也指四下  
濟初陰正應故本強而棟亦不橈且隆起而能任也  
不須再釋有它之吝矣三為棟橈之由四棟隆傳言

因不撓乎下可知剛過而中彖傳之言矣○

四本兌體兌加

巽則本益弱惟其兌金化水滅木者反生木且水體更旺于金所以棟隆而本亦強

九五枯楊生華老婦得其士夫无咎无譽象曰枯楊生華何可久也老婦士夫亦可醜也

九五變恒之六五在恒五以陰變陽為大過繫以恒其德貞而謂之婦人吉夫子凶者兼大過之義也大過大者過也恒其德而貞固為美德矣然婦人之陰而用恒貞之德則吉夫子之陽當濟陰之時不能使

陰陽均平時出咸宜則亢陽而凶矣德也貞也俱兼  
美惡言不可端以德為美貞為正也蓋有善德有惡  
德有貞固有貞正耳言婦人夫子又與本文老妻士  
夫相應其取象之辭亦曉然矣

在本文變陽為陰為恒可謂濟陰應得吉占矣而繫  
之以枯楊生華老婦得士夫无咎无譽何也五所濟  
者上爻之陰老婦也濟陰而濟老婦老婦老陰將變  
少陽不能得濟也所以枯楊生華華生而中益枯陰

氣將盡矣濟於陰而如老婦之不能生育何益乎无咎无譽者雖不助陽亦不能濟陰無用之義也象傳言不可久亦可醜就象以明義不能濟陰可思矣

上六過涉滅頂凶无咎象曰過涉之凶不可咎也

上六變為姤之上九在姤之上爻以陽變陰為大過當姤終而有姤其角之象角姤而過則抵觸而已何婚媾之有吝之道也兼大過陰在上為老婦不能得陽之濟而末終弱無益於大過者也

在本爻以陰變陽為姤陰弱於末而更變陽以卦陰  
德之悅變為陽德之健大過之極而仍過於大過則  
過涉滅頂之凶何可免乎又曰无咎者為其變姤也  
變姤則陰生於初爻矣在復上爻之陽為碩果不食  
而復已生於此碩果中就上爻之陽已得復初爻之  
陽矣在大過上爻之陰雖滅頂而變姤陰生已兆於  
此滅頂中就上爻之陰已得姤初爻之陰也故曰凶  
而又曰无咎之義也本卦貴陰大過之極而凶變姤

以陰生為无咎也如象辭以棟橈為陰弱又云利有攸往亨為陰德之悅而異行也聖人語簡而意該矣象傳曰不可咎也謂陰能變陽不可咎所以扶陽乎似非也謂陽過滅頂而變始陰已下生何可又咎之乎仍是濟陰柔於剛中均平調濟之義也

以上外卦三爻兌悅之體德四變坎水濟陰陰生而本末不弱本末不弱則棟隆得吉矣五爻雖附上陰而老婦不能生育附陰而無濟於陰也上六陰主外




卦變乾剛積於上本愈弱矣故有滅頂之凶大過之重本弱如此上爻本主外卦變陽為姤雖凶然變姤即所以濟陰而使本不弱也故與初分主乎内外卦而上又歸重於初以初為通卦主爻焉

大過大者過剛過而中本末弱也以四陽在中二陰在本末取象義固然但本末弱似重在本弱而不在末弱蓋本強而末亦不弱矣故初以柔為藉而得安重本也二以相與初而得士妻无不利三以輔二陽

而棟橈四以應初陰而棟隆五以得老婦而无咎譽  
上以老陰無用得凶而以變姤生初陰為无咎大過  
之貴陰而應濟陰六爻象義明曉蓋如此也卦之根  
於坤而用陰主乎二陰爻而猶以初陰為主也知愚  
說之非逞臆也

坎下



坎上

坎坎離二卦相錯所謂水火不相射乎然先天八卦乾  
坤定位次以山澤通氣次以風雷相搏然後次以水

火不相射今上經首乾坤天地定位也未敘山澤風雷而即敘水火不相射乎於此知另有說焉蓋坎離二卦敘於上經之終明有天地次有水火耳至下經之末既濟未濟方是明水火不相射錯者以對為交也射者各成一體以相沖也至於相交而不相射此水火理氣之自然也故坎離為有天地以後第一先有之物在天為日月成象在地為水火成形此二物之形究為有質無形藉土而成水藉木而成火可見

水火輕清居多生於初有天地之時也所以敘於上  
經之終與乾坤相配在先天八卦乾南坤北離東坎  
西本自相對成四正之卦後天八卦雖變其位而敘  
卦終不易焉故前聖後聖必有同揆者也聖心之理  
一易之道亦一而已矣

坎錯乎離而寔根於乾亦中又乾陽也四陰二陽以  
陽為貴為主焉在上經四陰二陽之卦皆歸於坎如  
屯如蒙如觀如臨如頤是也大過後承接乎坎可知

敘卦之聖人聚羣陽為主之卦歸宗於坎所以會元  
於乾耳即三陽三陰二陽四陰一陽五陰之卦凡主  
乎陽根於乾者無不歸於坎所以會乎乾之元故坎  
終上經之陽卦焉

習坎有孚維心亨行有尚

彖辭曰習坎有孚就天地之水以言氣化無論主宰  
也水之流行也如朝夕之潮伏秋之汛皆熟習聞見  
有一定之日時者也且水行故道有一定之坎也盈

科後進有一定之行也皆因有主宰乎水者故水之  
有孚如此耳占者體之以主宰乎水者為有孚者之  
心其存於中者既誠則行於外者自沛然莫禦矣是  
維心有誠故亨以亨為行斯其向往為可尚焉坎以  
一陽入二陰中此主宰乎水者也以一陽入二陰而  
成水即以一陽流動乎二陰也此一陽即乾元之陽  
在坎為中爻也乾元之陽統天何物不統而天一生  
水水之主宰更易明矣

象曰習坎重險也水流而不盈行險而不失其信維心亨乃以剛中也行有尚往有功也天險不可升也地險山川丘陵也王公設險以守其國險之時用大矣哉

彖傳明坎名義曰習坎重險也坎而言習為善游於水者言乎然就水言坎亦習也逝者如斯而來者不已非習而何以不舍晝夜乎謂之重險則就内外卦取象也水既為險德矣然其流也常不盈也水盈科而後進何謂不盈盈而即進非終於盈流水為象如

此故雖為重險而其行則不失信也此習坎而謂之有孚也水之德險惟有信以為行則險不為險體乎坎者能維心而致亨則法乎坎德之剛中以為心所以必能亨也體既主於有孚行自往而有尚其有功也亦同於水之所至皆有潤物資生之利也是險之為德乃至平而非險矣推之天地天之險不可升地之險在丘陵王公因地之險而設險以守其國險可廢乎設險者因險而所以守國者不常在於險亦在



乎維心亨行有尚而已矣習坎之有孚蓋為出險者  
謀並為設險者謀也所以謂之險之時用大矣哉險  
之設在地利也險之義在人和也險之時在天時也  
天時不如地利地利不如人和此孟子所言守險之  
本於維心亨也中庸曰素患難行乎患難君子無入  
而不自得焉孔子所言處險之本於維心而亨也因  
時之用洵大矣哉

象曰水洊至習坎君子以常德行習教事

象傳曰水洊至習坎水之德以恒久為有常以流行  
為能習也君子體之常其德行如水之有一定之溝  
渠且如水之無一息之間斷懋學如是進德亦如是  
修己如是教人亦如是此君子取義象於坎而用易  
也本義謂熟而安之夫水則善乎安流君子則尚乎  
安行維心亨而行有尚象傳朱註俱言之切矣

象傳  
二語

仍是上下  
卦分屬

初六習坎入于坎窞凶象曰習坎入坎失道凶也

初六變為節之初九在節初以陽變陰為坎險在外而內存悅自得其樂而無事於冒險不出戶庭正以節而守之為行也所以无咎也

在本文以陰變陽為節變兌而樂居於險則所謂習坎者玩乎坎也所以有入坎窞之凶也象傳曰失道凶也失於處險之道以悅豫為德是以入坎窞而不能出矣

九二坎有險求小得象曰求小得未出中也

九二變為比之六二在比二以陰變陽為坎取坎陽  
居中之義率二陰而比於五故吉而必貴於貞貞即  
坎之中也得陽剛中正之道則比而吉也

在本文以陽變陰為比亦取比義恐其在險變為坤  
順不能脫險故示之以有險然變比凡比皆吉故云  
求小有得何也同類皆陰比合其心力可以小有得  
耳象曰求小有得雖未出險然處險能不失坎中之  
陽德亦未可為凶悔也且不出中即出險亦可漸致

矣

六三來之坎坎險且枕入于坎窞勿用象曰來之坎坎終无功也

六三變為井之九三在井三以陽變陰為坎兼取坎義為井渫而不食則使人心惻然必動念欲汲矣王明並受福指九五一爻在兩卦皆陽剛中正也為坎為井俱以陽貴為用所以言獻於王而並受其福在本爻以陰變陽為井兼取井義為來之坎坎外險

方來三鄰於外坎以險為安亦將入於坎窞而勿用也井乃坎之深入難出者三在險之中又外有險故曰來之坎坎安枕于險變巽而入故勿用也象曰來之坎坎終无功也變巽而入重險之內何功之有在三

內卦上爻來之坎坎已出內險但險豈可枕外卦又有險至所以入坎窞而終歸勿用勿用非無用仍當思所以濟也

以上內卦三爻坎體重坎成坎以內水為外水之深者故初爻入于坎窞二主內卦小有得未能出險合

外卦五爻二陽振動方能出險也二位得中聖傳言  
未出中必合五之得中方能出險也故五主乎全卦  
也蓋濟險得出必歸外卦耳三同初入于坎窞又因  
外水來之坎坎三鄰外為受外水之位也究以二爻  
主內卦者不越以陽為有孚斯得維心之亨也

六四樽酒簋貳用缶納約自牖終无咎象曰樽酒簋貳  
剛柔際也

六四變困之九四在困四以陰變陽為坎兼坎義出

於下坎之險變為兑悅矣故曰來徐徐困于金車本義謂坎有輪象是亦兼貞悔卦為言矣愚謂金車指變兑為金耳朱子謂兑無金義然觀澤火革而繹從革之義似兑為金亦不自術家始言兑為金也內卦初爻變兑入于坎窞困卦四爻本兑困于金車兑有悅樂怠斁之義也此所以終吝乎

在本爻變陰為陽為困兼困義而以樽酒簋貳用缶為象亦因兑悅附于五之中而取象也納約自牖雖



非出於正然以悅德而有孚是立誠為正而以制用  
為行權出險行必有尚矣所以終无咎而得濟也象  
曰剛柔際也謂四以柔變剛得乎有孚之心則得乎  
剛柔交際之道也卦以內外兩陽居卦中為貴而二  
之陽不能如五之辭者卦有重險以五在外卦為濟  
險之主爻也四近於五而變陽故得有孚之心且四  
柔與五剛亦得交際之道矣非象傳何以明六四之  
得吉占乎卦之主於五爻之陽亦於此象傳可得會

心也觀五爻之辭更為合於傳言之義

樽酒簋貳用  
缶乃以純朴

之心為悅其  
附陽也切矣

九五坎不盈祇既平无咎象曰坎不盈中未大也

九五變師之六五在師五以陰變陽為坎師卦雖以

九二之陽爻為主然承天之寵則出於五爻也故五

爻有取於主師之君象曰田有禽利執言必有誓詔

之言以申執禽之令也古者田以講武宜其有命令

矣又以長子帥師為勸以弟子興尸為戒皆為君以

命師之義也

在本爻主乎本卦故取象於水坎不盈祇既平則有  
孚之義也坎不盈而常平為陽德剛健中正常存於  
中之道也維心之所以亨也何咎之有象曰中未大  
也中不盈而常平不敢自以為大此堯之允恭克讓  
舜之舍己從人禹之謹小慎微也惟其不自以為大  
而德之大莫京矣再堯之咨舜曰允執其中四海困  
窮天祿永終執中之訓本於翼翼之小心如此惟得

中則平而不盈必無自大之心矣

上六係用徽纆寘于叢棘三歲不得凶象曰上六失道凶三歲也

上六變為渙之上九在渙上爻以陽變陰為坎兼坎義而渙散以濟險則血去也遯出也遯即遠也觀象傳遠害也可知遯為遠矣本義謂遯惕也寧從傳可也无咎者能渙而出險即至血出終以遠出為免咎也

在本爻變陰為陽為渙兼渙義在險中而渙散將不能出險矣繫以係用徽纆置于叢棘所謂衣敗絮行荆棘中也所以三歲之久不能出而凶可知矣象傳曰上六失道凶三歲也謂其久耳上文變渙恐其久于險者出險之志欲崇而不宜渙渙則緩而失道矣水以不盈為貴者惟其平也渙而不能盈科而進則平不能平矣過不及皆不可謂之平也蓋平即中也惟以平為盈以盈而進為不盈乃水中正之義即濟

險之吉道也非陽剛中正為德何以能不盈而平平而能進以出險乎是以以九五之中爻為主坎而能濟險者也在上位又有其德以出險也何難乎

坎卦為上經諸貴陽之卦所歸本卦又以五爻之陽為主其道則取於不盈既平而已善乎用陽者亦惟不盈既平乃與乾之用九見羣龍無首同一義也見及此者可以會通全易矣

乾言龍而坎言水坤言牝馬而離言牝牛天地水火

在上經首尾四卦相應取義亦可見一班矣

以上外卦三爻亦坎體四以附五陽用陽以濟險終  
无咎五則主乎外卦並主乎内外卦水乃至平正之  
德取五得中象之辭云既平不盈水之德也而處險  
中道如此亦不成險矣上不附陽而變巽進欲以出  
險難矣坎恃五陽中之爻出險然不過既平不盈而  
已可見出險之陽亦非取於躁動焉二爻小有得者  
不能平也不能平者陽不足也五之不盈即平也陽

亦不過也無過不及乃陽剛中正出險之道也故於坎明之以為六十四卦用陽者示其歸也

離

下



上

離離與坎相錯坎根乾而離根坤凡四陽二陰之卦為需為訟為无妄為大畜為大過俱以離為歸以終上經羣陰之卦但猶有疑義焉其中无妄大畜似陽卦然无妄者人之性大畜者人之德性也德也皆以心為主主於內所以歸于坤又就陰論也况陽多陰少



貴陰用陰何疑乎歸於坎離就陰陽之多少分根與  
歸陰陽互相維繫之道也剛柔相摩八卦相盪繫傳  
固言之本義謂盪而得六十四卦為根為歸亦相摩  
盪之義而已請以繫傳為證其疑可釋焉於是凡上  
經三陽三陰四陽二陰五陽一陰但根地主坤者皆  
歸於離以離終上經陰卦所以會乎坤之元而何非  
順承於乾元乎○天地之後首生水火原該盡有天  
地後之陰陽太極而兩儀乾坤也乾坤而水火四象

也因而為八為十六為三十二為六十四以至於無窮盡則皆由一而二而四所遞生也奚怪有坎離為上經陰陽諸卦會歸之說哉

離利貞亨畜牝牛吉

彖辭曰離利貞以陰根於坤故首繫以利貞而後言吉利貞為吉陰之道也畜牝牛者坤為子母牛又為牝畜之者養之也養陰如養牝牛合於離明以陰為德斯吉矣觀卦辭可知根坤主陰為離之正義

彖曰離麗也日月麗乎天百穀草木麗乎土重明以麗  
乎正乃化成天下柔麗乎中正故亨是以畜牝牛吉也  
彖傳釋卦名義曰離麗也明非有所麗則無從得其  
體成形之火必麗於物成象之日必麗於氣無所麗  
而不能自成水與火俱然如日月之麗乎天正見明  
之必有所麗耳然離日也何以並言月蓋因坎水之  
成象者為月亦必有所麗然後成象故因重明並及  
之再言百穀草木之所麗必麗乎土可見水不離土

之義且知坤之元資生萬物為凡陰之所托命也傳  
因彖辭畜牝牛而及離之根坤又愚說之明據也凡  
柔道皆陰也離以二柔爻麗於四陽爻之內能得其  
内外卦之中正即利貞也即亨之道也是以取乎養  
陰之義而象之以畜牝牛吉也牛為陰柔之物又用  
牝焉柔而又柔以此為養德養身形神俱得其養也  
形神兩妙固外道之論然心身兼養則聖賢正學也  
相去一間耳豈不嫌於無陽乎非也陰固有所麗也

非純陽之體則陰無所麗而何以養身非純陽之心則陰無所麗而何以養心欲養陰者必寶其陽此養身之道也欲養心者必全其仁此養心之道也明乎陰必麗陽先保其陽然後可喻養陰之義也豈牝牛無陽乎天下無無陽之物無陽則不生矣論陽物陰物祇就其偏勝者言或就其體用言非無陽方謂之陰物無陰方謂之陽物也彖傳又言重明以麗正乃化成天下正謂二爻之黃離元吉也坎內外二卦以

外卦之五爻為主爻離內外二卦以內卦之二爻為主爻也坎險曰習坎以險之濟者取義離明曰重明以明之下照者取義凡人涉險指將出險者為險之至也凡人仰明指從下見明者為明之至也所以坎主外卦之中爻而離主內卦之中爻也坎五之辭曰水不盈祇既平水陽德以不盈既平為得中也離二之辭曰黃離火陰德以居中而明為得中也二以黃為離明中正所以彖傳云柔麗乎中正釋牝牛土類

以是爻為本卦之主也重明在二固中矣而又麗乎  
正既中且正以為明所以能以文明之道化成乎天  
下也化也成也皆陰也黃離之陰德以化成之陰道  
用於天下此離之所以用坤道而根坤也所以會上  
經諸陰之卦爻也陽變陰化陽生陰成化成皆陰道  
也離以陰德又用陰道於天下無陽乎非也亦為陰  
麗於陽也天下之禮樂刑政皆陽也而化成之道在  
於制度文為之表躬行心得之內使天下不知其然

而自然風移俗易所謂化成乎天下也此聖人之陰  
德也而本於聖人之仁心德陰而麗於仁之陽也仁  
者性之理陽又生於陰也性者天命陰又麗於陽也  
陰陽體用如此進推上無極而下無窮矣學易者須  
慎思而明辨之

象曰明兩作離大人以繼明照于四方

象傳曰明兩作則兼月以言日也不然天無二日明  
何兩作之有彖傳明言日月麗乎天故象傳曰明兩



作天有日即有月而月之明即用日之明以為明明  
兩作兼坎離言以水火對於乾坤成乎四象不易之  
理氣也大人繼明照于四方日則繼日夜復繼月晝  
夜繼明無有已息文王之所謂緝熙也以此為明照  
于四方四方者地之上也無物不照不止于臣民無  
地不照不止于中國此所以明並日月也然所本者  
陰麗於陽陽附乎陰本於坤元之柔斯不察察為明  
矣至於坤元即順承乎乾元也仍是以陰麗陽而明

也而明亦非汶汶而黯矣此人君法日月代明以向明治天下之道也何非崇效卑法之所推乎

初九履錯然敬之无咎象曰履錯之敬以辟咎也

初九變旅之初六在旅初以陰變陽為離兼離義而取象于初位明之在初不大明所以瑣瑣取灾也

在本文以陽變陰為旅兼旅義而亦取象于初履者行之始也錯然者不順不安之象敬之无咎明而變止止於敬非止於行也止於敬無論居行動靜皆无

咎也象傳曰敬以辟咎誠辟咎之善道乎

六二黃離元吉象曰黃離元吉得中道也

六二變大有之九二在大有二爻以陽變陰為離陽  
實變為陰虛惟虛能受所以大車以載利有攸往也  
在本爻以陰變陽為大有得陰柔麗於陽剛之義且  
以坤之元寓於離中爻者兼得附麗乎乾元故為本  
卦之主爻也繫之以黃離黃者中色中正以為離明  
者也故元吉象傳謂得中道離不貴於明而貴乎以

中正為明中即坤元坤元即乾元乾元固大亨也元  
吉何疑乎黃色者土色坤之元在離中也辭言牛傳  
言土同義

九三日昃之離不鼓缶而歌則大耋之嗟凶象曰日昃  
之離何可久也

九三變為噬嗑之六三在噬嗑三爻以陰變陽為離  
噬嗑以四為所噬之物四剛而近乎三有噬腊肉遇  
毒之象動體而變明明固決而非動無以決因失動

體故小吝也

在本爻以陽變陰為噬嗑以明體變動當內卦之末  
已為日昃之離矣不知憂懼以保日中鼓缶而歌則  
大耋之嗟必速至而凶也是爻貞悔皆就變卦象義  
立辭象傳曰何可久也內卦外卦之際日之中也過  
則昃豈能久乎戒其貴於未昃而知懼也

以上內卦三爻離明之體德重離成離以下卦之離  
為明之至也故主二爻而繫以黃離中正文明乃本

乎坤元之柔而麗乎天者也初以附二敬為主而无咎三以過日中而嗟耄有凶二陽皆以附中陰成明之用耳故二爻為通卦之主爻

九四突如其來如焚如死如棄如象曰突如其來如无所容也

九四變為賁之六四在賁四以陰變陽為離繫之以賁如皤如白馬翰如者變明為止止其飾而不恃明以為明也皤如白馬皆素以為飾也匪寇而言婚媾

者二離火內外相麗冠也而陰必麗于陽有婚媾之象義矣

本文以陽變陰為賁何以繫以突如其來如焚如死如棄如乎四亦五陰之所麗也動而變止火動無所麗之物火不止日動無所麗之氣熱不止何也陽變陰不能止陰也象以火之來也突如其來至于焚如死如棄如也則宜于靜而不宜動變也或云火與日雖陰而所麗者陽陽宜動何謂宜靜乎不知火與日陰

體而陽用原麗于陽動者也今四為陰所麗之陽若動變則陰亦動矣陰動失麗其凶可知謂其不宜動變為陰耳象傳言突如其來如無所容也正謂陰動無麗失其範圍蓋陰盛而陽不能容畜矣如火之大起林木皆燬如日之甚烈草木皆焦日火之陰麗于陽木陽氣如水之麗于土也必行乎地中地足容水水方不為害若地不能容水便有水溢之溺如死如棄如矣以地于水推之可見火亦必有所麗失其所麗



則烘烈而不可制其為害滋大也一星不滅至于燎  
原聖人以無所容三字示之明矣 在火之失麗易  
見在日之失麗難知然暴熱之來也非陽盛也正陽  
氣之微也寒陽氣也寒水為太陽熱陰氣也君火為  
少陰運氣家固言之矣即以易論之一陽生後至二  
陽而天下大寒矣一陰生後至二陰而天下大熱矣  
所以寒謂之陽而熱謂之陰也若大火無所麗突如  
其來正足見所麗者約束之弱也○或曰暴熱者火

之陰氣散也。暴寒者水之陽氣散也。此說極有理。與失所麗之意甚合。非陽氣弱則火之陰不能散。非陰氣弱則水之陽氣不能散矣。以此明無所容更精微。蓋無所容乃所麗之氣弱不足以容中畜之氣耳。

六五出涕沱若戚嗟若吉。象曰六五之吉離王公也。

六五變同人之九五。在同人五爻以陽變陰為離。變明而生憂。故先號咷而後以剛健中正得笑。且大師克遇以化不同為同也。

在本爻以陰變陽為同人離體變乾何以出涕戚嗟  
乎蓋五君位為君難憂懼則吉矣象傳曰六五之吉  
離王公也似附麗于王公為義可見離卦之主爻在  
二即五亦附麗乎王公為象而不可以為一卦之王  
公也蓋離之重陽以下卦為正明如日也以上卦為  
麗於明者如月也君為日而臣為月月者王公之貴  
臣也日月為明兩作二為王公而五為貴臣后妃如  
月之明以日之明為明也

上九王用出征有嘉折首獲匪其醜无咎象曰王用出征以正邦也

上九變為豐之上六在豐上爻以陰變陽為離豐極而離已極離明極則不明豐蔽極則愈黯矣故有豐其屋蔀其家闕其戶聞其無人三歲不覲之凶

在本爻以陽變陰為豐明極而豐極非振作其威無以啟明也何也以離明而變振動也所以王用出征之象然嘉在折首惡獲匪盡醜類則明而出于仁也


此所謂陰麗于陽陽足以包容節制乎陰也故无咎  
象傳曰以正邦也柔而麗乎中正者為化成天下之  
道也亦此為以而已

以上外卦三爻亦離體而以内卦之二爻主卦外卦  
之五爻但主外卦四上兩爻附五五又附二以成重  
離也五以柔中居位然重明以下明為明汜若嗟若  
而吉者憂其明不足以照臨莫釋其憂也憂釋者月  
附乎日以為明如大臣之附乎王公也四以不附陰

而為火焚陽變艮止而弱也上以附陰而振威以正  
邦以變震也如初三兩爻附于二以從違為吉凶也  
亦皆以陽附陰成明之用也彖所謂日月麗乎天之  
象義也論天則日月麗于天論日月則天之氣原以  
運懸日月天地水火所以為老少四象而生八生六  
十四者此象義乎

離在天為日在地為火在人心神明也坎在天為月  
在地為水在人心性體也神明之動以性體為麗是

存仁理性體之靜以神明為用是發聖智此天地人  
不易之理數故聖人之心通三才合陰陽而一道德  
也上經以坎離終明乎根乾坤而會陰陽可見聖心  
矣



大易通解卷六